

ELB sindikatuak arto transgenikoa ebaki du Pagolan

Kutsadura gelditzeko, hazitako eremu guztiak mozteko deia egin zuen atzo

Lutxi Fourcade / Pagola

ELB Euskal Laborarien Batasuna sindikatuak deiturik, ehun bat laborari bildu dira arto transgenikoa mozteko atzo goizean Pagolan (Nafarroa Behera). Ekintza sinbolikoa baino gehiago, sindikatuak nahi luke hazi kutsatuen arazoa argitu eta konpondu.

KUTSADURA GENETIKOA zabaltzen dela eta, ELB sindikatuak ehun bat laborari bildu ditu atzo goizean Pagolan. Elkarretaratzearen helburua zen Pagolako laborariak ereindako hektarea erdi bat arto transgenikoa ebakitzea.

Afera abiatu zen duela hiru aste, Jean Luc Etxart Pagolako laborari gazteak jakin zutenean arto transgenikoa erein zuela. «Urte guztiz artoa egiten dut toki horretan eta hazi saltzaileak proposatu zidan Golden Harvest izeneko hazia baliatzea», adierazi zuen. Saltzailearen aholkuak jarraitu zituen baina laster ustekabe txarra izan zuen. «Duela hiru aste, saltzaileak deitu zidan abisatzeko arto transgenikoa erein nuela eta kontrol bat izanen nuela».

Berria jakin bezain laster, arto egileak abisatu zuen ELB sindikatua, behar diren

neurriak hartzeko. «Alorra txikia izan arren, auzo osoa eta herria kutsatzeko arriskua bazen eta erabaki bat hartu behar zen lehen bai lehen», gaineratu zuen. Era berean, Frantziako Gobernuak ohartua izan zen 4.800 hektarea arto landatuak izan zirela Frantzia eta erabaki zuen artoa ez moztea, nahiz eta arriskuak izan.

Mozteko beharra

Ondorioak ongi ikertu ondoren, laborariak eta sindikatuak erabaki dute alorra ebakitzea, geroako utziz diru kontuak. «Arrazoi ugari ditugu horrelako operazioak egiteko: hazi saltzaileek zikindu nahi dute hemengo artoaren fama, ekoizpen transgenikoa teknika totalitarioa da, kalitatea zangopilatu nahi dute», azpimarratu zuen Eric Dolosor, sindikatuko bozeramaileak.



CHRISTOPHE DE PRADA

Are gehiago, kuraia erakusteko garaia azpimarratu zuten laborariak. Izan ere, Frantziako Gobernuaren ikuspuntuari jarraiki, arto egileen elkarteak babesten ditu arto transgenikoa, geroari buruzko galderak baztertuz. «Erakutsi behar dugu ez dugula onartzen holako arto motarik, kalteak egiteaz gain ingurumenari, laborantza intentsiboaren ardatz garrantzitsua izanen baita», gaineratu zuen.

Segalari trebeak

Pagolako arto transgenikoaren hektarea erdia laster botatua izan da. Hain zuzen

ere, bildutako laborariak trebetasun handia erakutsi zuten sega erabiltzeko eta hamar minutu baizik ez zituzten behar izan dena lurrera botatzeko, kamera eta argazkilarien aurrean.

Barnealdeko laborari ainitzek erantzun zioten gonbidapenari, «horrelako gauza ez baita utzi behar», aitortzen zutenez. Biarnes aldeko laborari sindikatua, Anaram au Patac taldeak eta ATTAC tal-

deko kideek ere erantzun zioten gonbitari. Aukera paregabea zuten erakusteko ezadostasuna hazi transgenikoarekin. «Gaur egun, badakigu 211 hektarea landatuak izan direla departamenduan eta dei egiten diegu beste laborari hazi guztiak desegiteko, lorea agertu baino lehen». Izan ere, artoaren loreak laster agertuko dira, eta ondorio larriagoak izanen dira haien ustez.

ELB sindikatuak ehun bat laborari bildu zituen atzo goizean, hektarea erdi bat arto lurrera botatzeko.

Indarrak bateratzeko «behar handia»

Lutxi Fourcade / Pagola
Arto transgenikoaren ondorio latzak ezagutu arren, ez da erraza izan hektarea erdia botatzeko erabakia hartzea. Izan ere, Frantziako Gobernuak jakinarazi zuen joan den astean ez zuela inolako neurririk hartuko Frantzia landatutako 4.800 arto hektarearen aurka. Ondorioz, Pagolako laborariak ez daki norbaitek ordainduko dion ala ez mozututako artoa.

«Gogoeta abiatu dugu sindikatuaren mailan bide juridiko guztiak ikertzeko eta

ardura guztiak ongi definitzeko», azpimarratu zuen Francis Poineau, Confédération Paysanne sindikatuaren idazkari nagusiak. «Uda hartuko dugu aukera guztiak ongi ikertzeko eta sindikatuak kereila pausatu du hazi saltzaile, hazi banatzaile eta botere publikoaren aurka», gaineratu zuen.

Era berean, sindikatuak deia luzatu die arrisku bera ezagutzen duten arto egile guztiei. «Indarrak bateratu behar ditugu hazi egileek auzitan jartzeko

eta jasandako kalteak ordaintzeko», gaineratu zuen.

Ekintza sinbolikoa izateaz gain, sindikatuak espero du aukera izanen dela laborarien kontzientizazioa azkartzeko. «Hektarea erdi bat landatua izan bada ere Pagolan, ez da dudarik beste eremu zabalak direla Euskal Herrian ere, eta laborariak ohartu behar dira arrisku handiak direla geroari begira», azaldu zuen.

Laborariak zutenean hunkitu ondoren, sindikatuak gutun bat helaraziko

die hazi lantegiei eta banatzailei. «Hitzordua galdeginen diegu lehenbailehen, hazitako eremuen zerrenda jasotzeko, eta jasandako kalteak ordaintzeko bidea hartzeko», azaldu zuen Eric Dolosorek.

Arto transgenikoaren aurkako borroka eginez, kalitatezko desmarta defenditu nahi du sindikatuak. «Kalitatezko ekoizpenak eskatzen diren bitartean, ez dugu onartzen ahal horrelako kutsadura zabaltzea eta erretasun handiena beharrezkoa izanen da».

• GIPUZKOA •

EUSKO JAURLARITZAK LEZON, IBARRAN ETA LAZKAON SUSTATUTAKO ETXEBIZITZEN ONARTU ETA EZ-ONARTUEN BEHIN BETIKO ZERRENDAK ARGITARATUKO DITU

Eusko Jaurlaritzako Lurralde Antolamendu, Etxebizitza eta Ingurugiro Sailak jarraian aipatutako etxebizitzaren sustapenei dagozkien onartu eta ez-onartuen behin betiko zerrendak argitaratuko dituela jakinarazten du:

Udaletxe eta sustapenen erlazioa

LEZO: BOE 59 etxebizitza eta 30 Gizarte Etxebizitza
IBARRA: 24 Gizarte Etxebizitza eta BOE 30 Etxebizitza
LAZKAO: 9 Gizarte Etxebizitza

Zerrendak Gipuzkoako Etxebizitza Saileko Ordezkaritzan izango dira ikusgai aipatzen diren egunetan. Errekurtsoak aurkezteko epea adierazten dena da. Informazio gehiago eskuratzeko Etxebideren 902-42.44.44. telefono zenbakira dei dezakezu.

Zerrenden kontsulta eta errekurso epea

Zerrenden kontsulta epea: Abuztuaren 3tik 17ra
Errekurtso aurkezteko epea: Abuztuaren 18tik irailaren 18ra
Lekua: Gipuzkoako Etxebizitza Ordezkaritza (Andia 13, Donostia)
Ordezkaritzaren ordutegia: Astelehenetik-Ostilarera: 9.00-14.00.



EUSKO JAURLARITZA
LURRALDE ANTOLAMENDU,
ETXEBIZITZA, ETA INGURUGIRO
SAILA

GOBIERNO VASCO
DEPARTAMENTO DE ORDENACIÓN DEL
TERRITORIO, VIVIENDA Y MEDIO
AMBIENTE

Tfnoa. 902.42.44.44 www.euskadi.net/etxebide